

Friûl di Jevât

PAR CURE DA LA SOCIETÂT FILOLOGJICHE FURLANE

Vie Bellini, 3, Guriza - tel./fax 0481533849 - gorizia@filologicafriulana.it - www.filologicafriulana.it

Il Congrès domenie ai 2 di Otubar a Martignà

Cu la Filologjiche sui cuei di Dino Virgili

Domenie ai 2 di Otubar Martignà al darà il bon acet al Congrès da la Societât Filologjiche Furlane, il numar 93 da la lungje schirie di cunvignis dal Sodalizi.

Come ançe altris comuns tal dulin-tor di Udin - forsit propit par vie la posizion cussì dongje da la citât - Martignà nol à mai ospitat un Congrès da la Filologjiche: un pecjât par chescj paîs, che a àn cetant di contâ di fâ viodi.

Il teritori di Martignà, par esempi, al fâs di puint tra lis culinis, la planure e Udin, ducj elements impuartants e diferents inte gjeografie furlane. Tal passât cheste bieles posizion e à favorît la prime industrializazion, a la fin dal XIX secul, cui insediaments da la innomenade fabriche Delser e dal Cotonifici Cormôr, "alimentât" cu la aghe dal cjanâl Ledre, realtâts che si caracterizavin par la lôr capacitât di dâ di vore a la int, e soreddut a lis feminis.

La storie economiche dai ultins timps e je segnade dal disvilup da la zone a cunfin tra i Comuns di Martignà e di Udin, là che si cjatin la Fiere, tal ex Cotonifici, un centri comerciâl tra i plui grancj d'Italie, il Stadi "Friuli", il Palaç dal Sport "Carnera" e il Parc dal Cormôr.

Ma Martignà al è ançe tant di altri: la storiche Casse Rural e Artesane fondade 110 agns indaûr, e cetante int

Il teritori di Martignà al fâs di puint tra lis culinis, la planure e la citât di Udin, une bieles posizion che in passât e à ingulusît cetantis fameis impuartants e favorît la industrializazion

che e à onorât il paîs. Jenfri lis personalitâts che a àn dât lustri al Comun, o ricuardin Dino Virgili di Sarsêt, mestri, poete e anime dal grop leterari di "Risultive", il professôr Giorgio Antonio Feruglio che, cul so progjet di prevenzion da lis malatiis dal cûr, al à fat cognossi Martignà in dut il mont e pre Oreste Rosso, il plevan musicist che al à metût dongje plui di un centenâr di oparis di musiche sacre e profane.

Par contâ di ducj i aspjets storics, culturâi, economics, ambientâi e sociâi, la Societât Filologjiche e publiche ogni an in ocasion dal Congrès un volum monografic, il "numar unic". Chest an il volum "Martignà" al è stât metût dongje di Carlo Venuti, vicepresidente pal Friûl centrâl, che al cognôs une vore ben la realtât locâl, ançe in grazie da la sò lungje esperience di responsabil da la Biblioteche civiche "Elsa Buiese".

Ve culi il program dal Congrès, domenie ai 2 di Otubar: si tacarà cu la Messe par furlan a lis 9.30 tal Domo di

Sante Marie Assunte, compagnade da la Corâl parochiâl di Martignà direzude dal mestri Federica Nobile; a la fin da la liturgjie, compagnâts da la Filarmoniche "Leonardo Linda" di Nearêt direzude dal mestri Samuel Micconi, si larà tal Auditorium "Impero", là che a lis 11 a tacaran lis voris dal Congrès cul salût dai sorestants; Alberto di Robilant al presenterà une relazion su "Bonaldo Stringher e Martignacco" e par sierâ la buinore Carlo Venuti al presenterà il numar unic. Prime di lâ a gustâ, si varà la scree da la mostre di piture di Paolo Bulfone "Lavia, acqua di sorgenti", in Vile Ermacora. Tal dopomisdì, visitis a la scuvierte dal teritori, cu la gleseute di Vile Deciani, il zardin di Poggio Stringher (cjase di campagne dal prin governadôr da la Bancje d'Italie, Bonaldo Stringher) e, a Torean, Vile di Prampero e Vile Italia, cu la mostre fotografiche su la permanence dal re talian te prime vuere. Par informazions www.filologicafriulana.it, tel. 0432 501598.



VILE ITALIA A MARTIGNA

Lis comunitât lenghisticis a son la fonde da la autonomie regionâl

Incuintri jenfri Filologjiche e Confederazion slovene SSO

Cualchi setemane indaûr si son cjatâts a Udin i sorestants da la Societât Filologjiche Furlane e da la Confederazion da lis Organizazions Slovenis in Italie (SSO). E je stade la ocasion par cognossisi e par scrutinâ la situazion di tutele da lis minorancis e da lis comunitâts lenghisticis dal Friûl Vignesie Julie. Soredut, la Societât Filologjiche e la Confederazion a àn in comun cetancj valôrs che a fasin di tamon a lis lôr ativitâts: tra chescj la cunvinzion di tignî dûr e di madressi il patrimoni culturâl, lenghistic, etnic e la atenzion a lis realtâts locâls che a son la fonde da la specialitât da la nestre Regjon.

Propit partint di chestis fondis al è une vore impuartant metisi adun par mantignî la autonomie regionâl e par promovi lis politicis pal avignî intune suaze europeane.

Al incuintri a jerin presints, par la Filologjiche, il president Federico Vicario e il vicepresidente pal Friûl di soreli jevât Renzo Medeossi; la Confederazion e je rapresentade dal president regionâl Walter Bandelj e di Ivo Corva, Filip Hlede ed Anna Wedan.

L'argument principâl al è stât il prude-lâ lis lenghis dal teritori tai diviers aspjets sociâi, tal ûs da lis lenghis tai cartelons publics e tai programs scuelastics. Si rimarche che di bande da lis istituzions publicis da la Regjon al sa-

rès il câs di pandi sensibilitât e disponibilitât te aplicazion da lis normis di tutele statâls e regionâls. Al è stât ançe ricuardât che tal avignî si varesin di inmanea iniziativas insiemit sei in Regjon sei a Rome, par ricuardâ lis esigjencis e lis domandis da lis nestris comunitâts lenghisticis intun moment là che il Stât e la Regjon a son plui atents a altris temis.

Dal pont di viste amministratîf a preocupin lis riformis cumò in vore, che no tegnin cont da lis realtâts dal teritori; lis gnovis normis pai balançs publics a oblein a doprâ i finanziaments dentri dal an, riscjant



di no rivâ a investî dutis lis risorsis e di dovê tornâls al Stât o a la Regjon.

La Filologjiche e la Confederazion a dividin ançe il rispjet dai valôrs da la tradizion cristiane: si riten impuartant che te Glesie locâl, sei te liturgjie sei te pastorâl, a sedin valorizadis lis specificitâts lenghisticis dal teritori.

L'incuintri si è sierât cu la declarazion di volontât tal prontâ un document insiemit, par disvilupâ e rinfuarçâ la colaborazion pal avignî jenfri la Societât Filologjiche e Confederazion SSO.

La cunvigne da la Deputazion

Si tignarà sabide al 1.n di Otubar a Gurize la cunvigne anuâl da la Deputazion di Storie Patrie pal Friûl. Chest apontament, rivât ae 93.e edizion e inmanea cu la poie dal Comun, e je une ocasion par presentâ studis e ricercjis di interes storic.

Ogni an la Deputazion si cjate a cunvigne intune localitât diverse dal Friûl, cirint di rispjetâ une "turnazion": l'an passât si è tignude a Tresesin, tal 2014 in Cjargne a Paulâr e tal 2013 a Prate.

No je la prime volte che la nestre citât e ospite chest incuintri: il prin al fo tal 1923, po tal 1954 e la ultime volte tal 1987 cuntune cunvigne di studis internazionâl su San Paulin d'Aquilee. In agns plui dongje di ricuardâ tal Soreli jevât ju apontaments a Aquilee (2000), Caprive (2001), Cormons (2006), Cjamlunc (2008), Roncjis dal Teritori (2009) e la ultime volte a Migjee (2012).

La cunvigne si davuelzarà in sale "Dora Bassi" di Vie Garibaldi, e tacarà a lis 9.30 cul salût dai sorestants e e larà indenant cui interventis di Rajko Bratož (*La battaglia apud flumen Frigidum del 394*) e di Silvano Cavazza (*I primi decenni della contea asburgica di Gorizia*), po cu lis comunicazions di Riccardo Cecovini (*Organizzazione territoriale e rete viaria nella piana di Gorizia, secoli V-X*), Sebastiano Blancato (*Un documento su Lucinico del 1262*), Alessio Stasi (*Giovanni da Santa Croce (Janez Svetokriški): un predicatore goriziano dell'età barocca*), Paolo Iancis (*"Bastionate" per la rivoluzione. Il difficile esordio della nuova agricoltura nel Goriziano*) e Donatella Porcedda (*La donazione di Graziadio Isaia Ascoli alla città di Gorizia*). Al sierarà Sergio Tavano cu la relazion *Da Aquilea a Gorizia*.